

Cu hopi sacrificio y boluntad

MAESTRO ROY SNEEK A RICIBI SU LICENSIA DI PIANO TECNICO

ORANJESTAD (AAN) E conocido musico, maestro di school, amante di domino y maestro di musica Roy Sneek a logra licencia di Piano Tecnico na New York. Sin duda un gran logro pa Roy y pa e comunidad Arubiano pasobra ta prome jiu di tera cu ta logra gradua den e materia aki.

Hopi cansa, pero contento y satisfecho Sr. Roy Sneek a regresa for di New York (USA) na unda su persona a ricibi como promer Arubiano

su licencia di piano-tecnico na Museum of the American Piano.

Señor Roy Sneek no ta un personal desconoci den nos comunidad, e ta maestro di school, maestro di musica, piano, guitarra y cuatro, y ta drecha acesorionan musical. Amante di domino y ta forma parti di e campeonnan di tur tempo Old Parr. Practicamente tur piano aki na Aruba el a drecha y hopi instrumento musical. Roy tin basta aña ta drecha piano pero e no

tin su papel necesario manera tur maestro tin y como tal despues di a haya hopi recomendacion di su amigo y coleganan musical el a dicidi di busca informacion pa e por a bay sigui un estudio di 6 luna pa e logra su papel necesario pa e sigui haci trabao mas profesional y cual el a logra tambe.

Pa logra algo den bida mester di sacrificio, pero Sr. Roy Sneek a sacrifica di mas pe y su familia y pa Aruba engeneral. E mester a pidi liber di trabao pa e por a sigui su estudio. Pa no menos 6 luna el a keda New York pa e por a logra gradua sin ricibi salario pasobra Gobierno no a bay di acuerdo pa duna Roy liber cu paga pa e sigui e

estudio. Pero Roy mirando cu e mester e papelnan y cu Aruba no tin un graduado den e ramo aki, el a dicidi di bay studia sin ricibi pago. Su señora a percura pa e yiunan y cas pa asina Roy por a logra inicia y termina estudio.

Sr. Sneek kier a gradici UNOCA inmensamente pa e confianza den su persona y pa e financiamiento di e estudio intensivo aki, cual no ta uno asina facil. Tambe un danki ta bay na tur esnan cu ;a duna su persona (un jiu di tera) e empuhe pa sigui tal curso. Un gratitud tambe ta bay pa Air Aruba pa su servicio excelente y muy en especial pa Srta. Rosemarie Hernandez na Miami y Srta. Anna Zennen, station man-

ager na Newark.

Sr. Roy Sneek ta sumamente contento y ta dispuesto pa sigui yuda tur hende te caminda cu e por.

Sr. Sneek a logra algo hopi grandi pa comunidad Arubiano pasobra e a completa e curso di "piano tuning - regulating and repairing" cu ta masha poco hende na mundo a logra debi cu na Merca hopi maestro ta scoge un di tres, mientras cu Roy si a logra tur tres.

DIARIO ta manda palabranan di pabien na Roy cu a logra termina su estudio di piano tecnico cu exito y asina tambe bira prome Arubiano cu a logra algo hopi importante pa comunidad Arubiano.